

RIJEČ UREDNIKA

Haris HALILOVIĆ

Poštovani čitatelji,

pred Vama je novi dvobroj časopisa *Kriminalističke teme* sa sedam novih radova iz oblasti kriminalistike, kriminologije, sigurnosti te međunarodnog i krivičnog prava. Radovi specifično tretiraju problematiku organizacije policije, prijestupništva i viktimizacije mladih, korupcije u javnoj službi, migracija i migracijske krize, razvojne kriminologije, evropske policijske saradnje i položaja maloljetnih počinitelja krivičnih djela. Tako izvorni znanstveni rad Stavovi dionika u policiji o budućnosti hrvatske policije tretira stavove različitih dionika u organizaciji policije po pitanju različitih aspekata organizacijskih promjena u Republici Hrvatskoj. Prijestupništvo i viktimizacija mladih u BiH: Dinamika u periodu 2005-2015. i implikacije za prevenciju, slijedeći je izvorni znanstveni rad koji analizira obim i strukturu maloljetničkog prijestupništva u Bosni i Hercegovini temeljem podataka prikupljenih metodom samoprijavlivanja. Također, izvorni znanstveni rad Korupcija u javnoj službi u BiH prezentira rezultate deskriptivnog istraživanja sa pokazateljima razlika između muškaraca i žena u vezi sa stavovima o prihvatljivosti i prijavljivanju korupcije. Prethodno priopćenje pod naslovom Značaj i uloga pravnih dokumenata Ujedinjenih Nacija o migracijama, sadržava detaljan pregled pravnih dokumenata UN-a koji tretiraju problem migracija i migracijske krize. Slijedi potom pregledni znanstveni rad Pogled u razvojnu i kriminologiju životnog toka: kriminalne karijere počinitelja organiziranog kriminala, u okviru kojeg se kroz narativnu diskusiju prethodnih istraživanja prezentiraju dosadašnje spoznaje o kriminalnim karijerama počinitelja organiziranog kriminala. Također, pregledni znanstveni rad Nastanak i razvoj evropske policijske saradnje ispituje načine i uvjete nastanka i razvitka praksi međunarodne policijske saradnje na području Evrope. Posljednji rad u ovom dvobroju, stručni rad s naslovom Maloljetničko krivično pravo u Bosni i Hercegovini sa osvrtom na krivičnopravni položaj i odgovornost maloljetnika sadržajno predstavlja detaljnu analizu pozitivnopravnog okvira kojim se uređuje krivičnopravni položaj maloljetnih počinitelja krivičnih djela.

Koristim priliku da se zahvalim svim autorima, odnosno koautorima na dostavljenim radovima, recenzentima, kao i redakciji časopisa koja je i ovaj put uložila veliki napor da zainteresiranoj znanstvenoj i stručnoj javnosti, unatoč svim poteškoćama izazvanim COVID-19, predstavi kvalitetna istraživanja i radove na područjima kriminalistike, kriminologije i sigurnosnih studija ali i međunarodnog te krivičnog prava.

Glavni i odgovorni urednik
Prof. dr. sc. Haris Halilović